

Purguntas Frikuenti & Rispostas sobri Matrikula

Ki tenpu ki inskrison na Skóla Charter New Heights di Brockton (NHCSB) ta abri tudu anu?

Matrikula na Skóla Charter New Heights di Brockton ta sta abertu online tudu anu komesu di Dizenbru & ta fika abertu ti fin di autonu.

Pamodi ki New Heights di Brockton ta teni 2 inskrison abertu pa 2 anu differenti au mesmu tenpu?

Alvés dós inskrison ta sta abertu au mesmu tenpu: un pa anu letivu atual y kel otu pa prósimu anu letivu. Si skóla inda teni algun vaga disponivel pa anu kel letivu atual, é podi kontinua ku inskrison abertu, enkuantu inskrison pa anu ki ta ben tanbé ta sta disponivel.

Pur favor, sertifika ma dja bu skodji y manda inskrison sertu pa anu letivu ki bu kré pa bu fidju inskrevi.

Formulariu di inskrison sta disponivel na un munti lingua?

Sin, formulariu di inskrison online sta disponivel na Kriolu di Haiti, Kriolu di Kabu Verdi, Spanhol y Purtuges.

Nha fidju ta ganha vaga di forma automatiku logu ki é manda formulariu di inskrison?

Nau, tudu inskrison ten ki pása pa un prusesu di sorteiu. Data y óra di sorteiu ta bai ser publikadu na pájina pelu menus 30 dia antis di data di sorteiu. Para alen di kela, tudu kandidatu ta ben resebi un e-mail ku informason rilasionadu ku sorteiu. Puzison ki bu ta fika na sorteiu é selesionadu di forma aliatóriu y baziadu na disponibilidadi di vagas na kada klasi. Oferta di vagas ta informadu familias atraves di e-mail(s) ki foi indikadu na formulariu di kandidatura.

Modi ki N ta sabi si nha(s) fidju(s) dja dádu vaga?

Oferta di vaga ta informadu familias atraves di e-mail(s) ki foi indikadu na formulariu di inskrison. Pur favor, fika sienti na e-mail di noreplyenrollment@powerschool.com y/ó enrollment@nhcsb.org. Pa bu garanti ma sta ben resebi kumunikason di Skóla Charter New Heights di Brockton pa e-mail, tra tudu kes dós e-mail la di pasta di spam.

Kantu tenpu ki N ten pa N aseita un oferta di vaga di Skóla Charter New Heights di Brockton (NHCSB) pa prósimu anu letivu?

- Si bu fidju resebi un oferta di vaga entri Marsu y Agostu, bu ten **10 dia útil** pa bu aseita kel vaga

Kantu tenpu ki N ten pa N aseita un oferta di vaga duranti anu letivu atual?

- Si bu fidju resebi un vaga duranti anu letivu atual (entri Setenbru a Janeru), bu ten you have **3 dia útil** pa bu aseita kel vaga

Kuzé ki ta kontisi si N perdi kel oferta di vaga pamodi N dexe pása prazu di rispondi? Nha fidju inda ten opurtunidadi di studa na New Heights?

Si familias ka rispondi dentu di prazu ki foi difinidu, vaga di es alunu ta anuladu di forma automatiku, y es vaga ta dádu pa prósimu alunu ki sta na lista di spéra. Si familias inda sta interesadu na opurtunidadi di ses fidju studa na skóla, es ten ki torna manda un novu inskrison. Más un bés, pur favor djobi bu e-mail y atualiza bu informason di kontákitu si tivi algun mudansa.

Kuzé ki N ten ki fazi kazu nha informason di kontákitu, sima e-mail, número di tilifoni y inderesu muda dipós ki dja N fazi inskrison?

Pur favor, entra en kontákitu ku dipartamentu risponsavel pa matrikula pa enrollment@nhcsb.org ó toma pa tilifoni 508-857-5721 ixtenson 1302, y dá-nu informason atualizadu, nu ta fazi mudansas nisisáriu.

Skóla Charter New Heights di Brockton ta oferesi transporti?

Transporti é oferesidu pa Sidadi di Brockton pa alunos di Brockton ki mora na un distansia di más di 2 mília di skóla. Tudú alunos ki ta móra na Taunton ó Randolph ta ser transportadu. Kualker algen ki mora fóra di kes 3 distritu li ten ki ranja si transporti.

Skóla é di grása ó ten algun mensalidadi pa pága?

Sin, tudú skólas públiku charter na Massachusetts é skólas públiku gratuitu.

Kantu tenpu ki un alunu ta ten na lista di spéra?

Lista di spéra ta komesa desdi dia di sorteiu y ta bai ti fin di Janeru di 2027.

N teni pelu menus un fidju matrikuladu nes mumentu. N ten ki fazi inskrison pa nha(s) otu(s) fidju(s) tanbé?

Sin, pa konkori pa vaga, tudú alunu ten ki pása pa prusesu di inskrison y sorteiu. Ka bu skesi ma nu ten un pulítika di irmos ki ta prioriza irmos di nos alunos atual, ki sta na sistema di sorteiu.

Nu ka ta mora na Brockton, Taunton ó Randolph, mesmu asin nu podi fazi inskrison?

Sin, kualker alunu ki ta mora na stadu di Massachusetts, ki sta entri 6^{ta} ti 11^{ru} anu podi inskrevi pa entra na Skóla Charter New Heights.

Nhos ten algun pulítika di prioridadi pa entrada na sorteiu?

Nu ten un pulítika di prioridadi ki ta fla ma alunos óra ki entra na sorteiu, logu es ta resebi vaga di akordu ku kes orden li:

1. Irmos di alunos ki dja sta matrikuladu
2. Alunos di nos rijion di Brockton y Taunton
3. Si inda sta vagas, alunos ki KA ten irmon matrikuladu y ki KA ta móra na nos rijion ta ben dádu kes vagas
4. Tudú alunos ki resta, pa orden di puzison na sorteiu, ta ben podu na un lista di spéra

Nha fidju sta na lista di spéra pa es anu letivu, N ten ki fazi otu inskrison di novu? Nha fidju ta bai fika ku mesmu número di anu pasadu?

Sin, bu ten ki fazi inskrison pa prósimu anu letivu, mesmu ki bu fidju staba/sta na lista di spéra di es anu pamodi inskrison y lista di spéra KA TA pása di un anu letivu pa kel otu. Vagas ki ta dádu y lugares na lista di spéra ta selesionadu di forma aliatóriu dipós di kada anu d inskrison, pur isu provavelmenti si inskrison ta ben resebi un novu número na lista di spéra, prinsipalmente pamodi bu fidju sta bai inskrevi na un klasi diferenti.

Ki tenpu ki nha fidju ta mudadu di lista di spéra pa un oferta di vaga?

Ka ten komu sabi ki tenpu ki un vaga ta ser abertu y un alunu tradu di lista di spéra. Un vaga podi fika disponivel simanas ó mézis dipós di sorteiu, alvés ti fin di Janeru. Pa otu ladu, si un klasi ó tudú klasi sta ku tudú vaga xeiu, lista di spéra ta fika sima sta.

N manda inskrison pa un munti alunu. Si un dés resebi vaga, tudú es ta resebi vaga tanbé?

Si un fidju dádu vaga, kes otus ta ben dádu prifirénsia di irmos, logu ki kel primeru fidju matrikula na New Heights.

Nha fidju dádu un vaga ultimu anu letivu mas pamodi alguns motivos, nu rikuza kel vaga. Nha fidju sta kualifikadu di forma automatiku pa vaga na Skóla Charter New Heights prósimu anu?

Nau. Bu ten ki fazi un novu inskrison. Oferta di vagas é selesionadu na kada sorteiu di forma aliatóriu y é baziadu na número di lugares disponivel.

Kenha ki sta kualifikadu komu irmon?

Un irmon é difinidu komu kriansas ki ten mesmu páis, podi ser ó biolójiku ó adotadu di forma legal. Nu ta verefika si é irmon ó nau atraves di sertidon di nasimentu y dokumentu di tutela legal.

N ten un fidju más grandi ki foi finalista di New Heights na ultimus sinku anu, nha fidju más novu ta ben ten direitu a kondison prifirensial di irmon?

Un kandidatu ten ki teni un irmon matrikuladu na New Heights na kel mumentu pa podi resebi prifirénsia na kondison di “irmon”.

N ten familias. Sima subrinhas, subrinhus, primus, ets. Ki sta nes mumentu matrikuladu na New Heights. Kela signífika ma nha inskrison ta ben resebi prifirénsia di irmon?

Nau. Di akordu ku es pulítika, “irmon” é difinidu komu kriansas ki ten mesmu páis, ker biolójiku ker adotadu di forma legal. Ekipa di matrikula ta bai verefika si é irmon ó nau atraves di sertidon di nasimentu ó dokumentu di tutela legal.

Ki dokumentus ki é nisisáriu pa fazi inskrison?

Óra ki dádu un vaga, familias ten ki da kes sigintis dokumentus di inskrison li:

- **Sertidon di Nasimentu** di alunu (y prova di tutela legal óras ki é ka familia biolójiku)
- **Rilatóriu Médiku y di Vasinason Atual** (di ultimus 12 més)
- **2 Konprovativu di Rezidensia** dentu di kel lista li (kóntas di servisu públiku, kontratu di ipoteka ó di renda di kaza, formularius fiskal atual)

Ten algun otu izijéncias pa fazi inskrison?

Sin, tudu familia ki dádu un vaga ten ki prinxi **Formulariu di Inskrison** (kópias inprimidu), ki ta inklui formulariu di autorizason, tanbé fazi un **Inskrison Online** na piriudu di másimu dós simana dipós ki é resebi vaga. Alguns dias dipós ki es dádu, tudu familias ta ben mandadu links pa fazi inskrison online pa e-mail.

New Heights ta iziji algun tipu di bistimenta spesífiku?

Tudu alunos di 6^{ta} klasi ti 10^{ma} anu é obrigadu a uza uniformis. Pulítika uniformi ta ben ser partiliadu ku páis na dia ofisial di vizita na skóla, na prusesu di inskrison y na otus atividades.

N podi intrega dokumentus di inskrison nisisáriu na Skóla Charter New Heights kualker óra?

Entra en kontákitu ku dipartamentu risponsavel pa matrikula, atraves di e-mail enrollment@nhcbs.org ó número 508-857-5721 ixtenson 1302 pa marka un reunion di matrikula. Un markason é inportanti pamodi ta garanti ma un funsionariu di ekipa di matrikula ta sta la disponivel pa resebe-u y finda prusesu di matrikula.

Y si N mesti ajuda na prusesu di inskrison?

Nu ten tudu prazer na rispondi kualker di bu purgunta. Pur favor, xinti avontadi na kontakita-nu atraves di e-mail enrollment@nhcbs.org ó pa número 508-857-5721 ixtenson 1302. Nu ten algen na ekipa ki ta fala Spanhol, Purtuges, Kriolu di Haiti y Kriolu di Kabu Verdi, pa djuda-u na prusesu di inskrison.